



WORLD MIRACLE MISSION CENTRE

P.O.BOX 78620 DAR ES SALAAM, TANZANIA

TEL: +255 754 69 20 19, 754 470 924

E1: pastorjustice@worldmiraclemission.org

E2: pastorjustice@gmail.com

W: www.worldmiraclemission.org

1

MWONGOZO WA HUDUMA YA KUPANDA MAKANISA

NOVEMBA 15, 2016

DAR ES SALAAM

APPROVED: WMMC

PRESIDENT/ BISHOP: JUSTICE LUTASHOBYA

YALIYOMO

A	UTANGULIZI	2
B	MAONO YA WMMC	3
1	KATIBA NA USAJILI WA WMMC	6
2	MISINGI YA IMANI YA WORLD MIRACLE MISSION CENTRE (FAITH ST	6
3	MWONGOZO WA MAKANISA	9
4	ROHO YA HUDUMA ZA WMMC	16
5	MIKUTANO YA INJILI KILA MWAKA	17
6	HUDUMA YA KUPANDA MAKANISA	22
7	HUDUMA ZA JAMII KWA WMMC	23
A	KUFUNGUA SHULE ZA MSINGI, SEKONDARI NA VYUO KWA WMMC	24
B	KUFUNGUA ZAHANATI NA HOSPITALI KWA WMMC	25
C	KUANZISHA VITUO CHA YATIMA KWA WMMC	26
8	UFADHILI NA SADAKA	26
9	TOVUTI ZA WORLD MIRACLE MISSION CENTRE	28
10	USALAMA WA HUDUMA YA WMMC	29
I.	KAZI ZA TUME YA USALAMA	30
II.	MIGOGORO YA NDANI YA WMMC	30
III.	MIGOGORO YA NJE YA WMMC	31
IV.	MIGOGORO YA KIKATIBA	31
V.	MALI ZA HUDUMA	32
VI.	MALI ZA FAMILIA YA WATUMISHI WA WMMC	32
11	DIRA YA WMMC KUFIKIA MWAKA 2020	33

A. UTANGULIZI

WORLD MIRACLE MISSION CENTRE ni Asasi ya Huduma ya Injili na Umishonari na ufadhili isiyo ya Kiserikali wala kibiashara, ambayo ilianzishwa na WAINJILISTI wenye kijiweka wakfu kuleta majibu ya matatizo yaliyopita, sasa na yajayo katika jamii ya Tanzania na Ulimwengu, kwa kutumia INJILI YA YESU KRISTO kama chombo cha msingi. Huduma hii ilianzishwa na kuzinduliwa Septemba 29, 2006 Dar es salaam, Tanzania kwa uongozi wa Mhasisi Mkuu Mchungaji Justice Lutashobya.

WMMC Ilisajiliwa Chini ya Baraza la Mekanisa ya Kipentekoste (CPCT) tarehe Disemba 13, 2014 kwa Kumbukumbu Nambari CPCT/HQ/KS/46/2014. WMMC ilisajiliwa chini ya sheria ya Jamhuri ya Muungano wa Tanzania, Wizara ya Sheria na Katiba; kwa msajili wa Muungano wa Wadhamini, RITA CAP. 381 kwa jina la ***The Registered Trustees of World Miracle Mission Centre***; hati ya usajili ni nambari **5230**, tarehe 17 Desemba 2015.

World Miracle Mission Centre maana yake, kwa tafsiri ya Kiswahili ni Kituo cha Umishonari wa Muujiza Mkuu Duniani. WMMC inaamini Muujiza mkubwa Duniani ni WOKOVU wa njia ya pekee ya YESU KRISTO. WMMC ni mpango wa Mungu wa kutenda Muujiza Mkuu Duniani ambao ni WOKOVU. Kuzaliwa kwa Yesu, Huduma zake duniani; Kusulubiwa kwake; Kifo chake Msalabani; Kuzikwa kwake; Kufufuka kwake, Na Kuondoka kwake, ni MUUJIZA MKUBWA DUNIANI kuliko miujiza yote ambayo iliwahi kutokea.

Kwa mujibu wa ibara 12 ya Katiba ya WMMC, **Mwongozo wa makanisa**, umeandaliwa tayari ambao utaitwa MWONGOZO WA HUDUMA YA KUPANDA MAKANISA NAMBARI 1. NI HAKIKA kwamba WMMC ni Huduma ya Kipentekoste, ROHO MTAKATIFU AMETUTHIBITISHA; BIBLIA IMETUTHIBITISHA; MAKANISA MENGI TANZANIA YAMETUTHIBITISHA; CPCT iliyotusajili inathibitisha; Mkuu wa Wilaya amethibitisha na Wizara ya Sheria na Katiba Kupitia RITA imethibitisha kwa HATI YA USAJILI.

B. MAONO YA WMMC

Maono ya kuanzisha Chombo hiki cha Umishonari, Uinjilisti na Ufadhili, ni kwa sababu ya matokeo ya matatizo ya maadili ya kiroho na kijamii nchini Tanzania na Ulimwengu. Waathirika wa kibailojia na kiroho kama magonjwa sugu, ufusika, ubakaji, umalaya, madawa ya kulevya, ushoga, ujambazi, ugaidi katika ngazi ya kitaifa na kimataifa, ongezeko la ndoa kuvunjika, vita ya kifamilia, kabila kwa kabila, taifa kwa taifa, wimbi la ukimbizi wa vita, na unyanyapaaaji unaowakabiri wajane, machokoraa, yatima ni ushahidi kwamba hakuna usalama wa kiroho na kimwili katika jamii ya Tanzania na sehemu zingine Ulimwenguni.

Mhasisi Mkuu, Askofu Mkuu, Mchungaji na Mmishonari Justice Lutashobya alipata maono ya kuanzisha huduma hii ya Kimishonari wakati alipokuwa katika maombi ya kufunga siku 40, Mwezi Juni Mwaka 2006.

Baadaye Mungu alimpa njia saba za kutekeleza maono haya na akasema ndiyo itakuwa mirija saba katika kutekeleza huduma ili kuipa nguvu, sawa na NENO LA MUNGU katika kitabu cha ZAKARIA SURA YA NNE. Mungu aliendelea kusema naye kwamba hii mirija itakuwa ni Kurugenzi saba za WMMC kama zilivyoielezwa katika ibara ya 12 kipengele namba 1 na 2.

Mungu alithibitisha kwamba hizi ndizo zitakuwa roho saba za huduma ya WMMC kwa mujibu wa ISAYA 11:2. Katika kitabu cha Ufunuo sura ya nne na tano, hizi roho zimeelezwa kuwa ni Roho saba za Mungu ambayo ni macho saba ya Mungu kulingana na kitabu cha ZAKARIA SURA YA NNE.

Biblia inasema; *"Lakini mtapokea NGUVU, akiisha kuwajilia juu yenu ROHO MTAKATIFU; nanyi mtakuwa mashahidi wangu katika YERUSALEMU, na katika UYAHUDI WOTE, NA SAMARIA NA HATA MWISHO WA NCHI."* (MATENDO 1:8).

Kimsingi, Huduma ya WMMC imejengwa katika msingi wa maono saba kwa mujibu wa ibara ya 12 ya katiba. Maono saba ndiyo yaliyounda Kurugenzi saba za World Miracle Mission centre kama ifuatavyo:

1) Injili na Umishonari

Ukurugenzi wa Injili na Umishonari utaendeshwa na kuratibiwa na makao makuu ya WMMC na baadae kupanuka hadi kwenda kwenye vitongoji, vijiji, miji, manispaa, majiji katika taifa na mataifa. Kutakuwepo Mratibu Mkuu ambaye atashughulikia Mikutano ya Nje, Ndani, Semina, makongamano na shule za huduma sizo na kuta. Huduma ya Injili itaongozwa na SHERIA YA KRISTO, ambayo itakuwa ndiyo sheria BABA na SHERIA YA NCHI itazingatiwa.

2) Kupanda Makanisa

Huduma za Kupanda makanisa; zitaendeshwa kwa kufuata mwongozo nambari moja (1) na Nambari mbili (2). Sheria na Kanuni zitakazotungwa na Wadhamini Wahasisi wa Huduma hii kulingana na malengo yake, Misingi ya Umishonari na Misingi ya Imani ya Wokovu kwa mujibu wa Ibara ya 3 ya katiba hii, zitatumika kuogonza huduma za makanisa.

Ukirejea kipengele nambari 2 cha Mwongozo wa Makanisa; WMMC inasimamia misingi 14 ya imani ya Kipentekoste.

3) **Maombi na Maombezi.**

Ukurungenzi wa Maombi na Maombezi utahusika na kufunika taifa la Tanzania na dunia kutoka katika vituo vya maombi na shule na vyuo vya maombi vilivyoanzishwa na vitakavyofunguliwa nchi nzima vikiratibiwa na kituo kikuu cha makao makuu ya huduma kitakachoitwa KITUO KIKUU CHA UMISHONARI NA INJILI. Huu ni msingi wa umishonari ibara ya 4.2 na 4.3, juu ya kufungua vituo vya maombi katika nyumba za waaminio ambao watakuwa nuru kusaidia kila mtu katika jamii kwa mahitaji na matatizo sugu Tanzania na ulimwengu. Rejea msingi wa 11 wa imani wa WMMC.

4) **Ufadhili na Misaada**

Huu Ukurungenzi ni muhimili maalumu sana kwa kuratibu mahitaji yote ya kifedha na misaada kwa ajili ya watu wenye mahitaji ya kiroho na kimwili. Hii itakuwa pamoja na kuandaa bajeti ya kufadhili makanisa, mikutano ya aina zote, misaada ya kimwili na kazi zote za umishonari wa kitaifa na kimataifa, ambayo itapitishwa na Mamlaka kuu ya Huduma.

5) **Elimu na Huduma za Nje**

Kutoa Elimu ya Msingi kwa watu wote, bila kujali dini, dhehebu, kanisa, huduma wala itikadi za kisiasa ni maono nambari tano ya WMMC. Kwa mujibu wa katiba, WMMC inatoa elimu kuanzia shule ya chekechea hadi vyuo vikuu vya Biblia, Huduma na taaluma vitakavyoanzishwa. Itakuwa ni lazima kila linapopandwa kanisa la WMMC, ni muhimu kufungua shule ya chekechea na Shule za Msingi na hata Sekondari.

WMMC imelenga hasa kwa wale watoto wasiojiweza kimaisha na vijijini kama mchango wetu katika maendeleo ya jamii kitaifa katika kutimiza lengo la huduma ya WMMC. Huduma hii itaelekezwa katika kutoa elimu kwa watu masikini, huduma kwa yatima na huduma kwa wajane pia.

Kufungua mashule, Vyuo na Vituo vya yatima; kutafuata mwongozo nambari 1 ambao ni Huduma za Kupanda Makanisa kwa baadhi ya mashule na vyuo ambavyo vitafunguliwa moja kwa moja na WMMC; na Kuna Shule na Vyuo ambavyo tutaingia ubia navyo kwa kufuata mwongozo Nambari 2 wa Kungia Ubia.

6) **Miradi/Huduma za Jamii**

Miradi yote ya huduma ya WMMC itakuwa ni miradi ya kiroho na miradi ya maendeleo ya jamii. Miradi ya **huduma za kiroho** itakuwa pamoja na Uzalishaji unaohusiana na mambo ya kiroho kwa ujumla pamoja na uzalishaji na utoaji wa video za Injili, kubuni na kufanya machapisho ya vipeperushi, Kutoa matangazo ya Mikutano, vitabu vya kiroho, kujenga vituo vya radio, kujenga vituo vya televisheni na kutumia media zingine kwa ajili ya mawasiliano ya Injili.

Miradi mingine itahusu huduma za jamii ambazo zitapangwa na kuratibiwa na Mratibu huu kwa ajili ya kutoa huduma za afya, maji, makazi, barabara, mazingira na miradi mingine kwa kutimiza malengo ya Huduma kulingana na ibara ya 3.12-3.14.

7) Ushauri

WMMC itatoa huduma ya ushauri katika upande wa kiroho na kitaalamu pia kulingana na ibara ya 3.8 na 3.12-3.14 ya Katiba. Ushauri wa kiroho utazingatia uongozi wa Biblia kwa mujibu wa Agano la Kale na Agano Jipya; na Ufunuo wa Roho Mtakatifu. Ushauri wa kitaalamu utaongozwa na wataalamu waliosomea na kusajiliwa kwa utaalamu wao kwa mujibu wa sheria ya nchi.

1. KATIBA NA USAJILI WA WMMC

Kwa Mkuu wa Wilaya ya Urambo

Mchungaji Lutashobya alifanikiwa kupata barua ya usajili kutoka kwa Mkuu wa Wilaya ya Urambo kwa ushirikiano na Mchungaji Obedi wa Kanisa la WMMC Ussoke, Kata ya Ussoke tarehe **05 Februari 2015, Kumb. Na. AB 208/210/03/04.**

Kwa Baraza la Mekanisa ya Kipentekeoste Tanzania (CPCT)

Baada ya barua ya mkuu wa wilaya, Mchungaji Justice aliendelea na mchakato wa kupata barua ya CPCT, kwa vigezo vya kupata barua ya maoni juu ya usajili. WMMC ilisajiliwa katika Baraza la Mekanisa ya Kipentekoste kwa barua **Kumb. Na. CPCT CPCT/HQ/KS/46/2014.**

Kwa Wizara ya Sheria na Katiba (RITA)

World Miracle Mission Centre ilipeleka maombi ya usajili katika Wizara ya katiba na Sheria kama chombo cha Injili na Umishonari na kufanikiwa kusajiliwa Tarehe **17 Desemba 2015**, Hati ya Usajili kutoka Mkurungezi Mkuu wa RITA nambari **5230.**

Katiba Iliyosajiliwa

Katiba ya WMMC iliandaliwa na Mchungaji Lutashobya kwa ushirikiano na Bodi ya wadhamini na Mwanasheria wetu. Katiba ya huduma ya WMMC inazo ibara kumi na sita (16), na ilipitishwa na bodi ya wadhamini kwa ajili ya usajili.

Ibara ya Pili (2) ya Katiba inasema WMMC ni SHIRIKA LA INJILI, UMISHONARI TANZANIA NA ULIMWENGUNI NA **HUDUMA** NYINGINE ZA JAMII. **Ibara ya Kumi na Mbili (12) kipengele (12.2) kinaonyesha huduma** za msingi za WMMC, ambazo zinatokana na maono. Rejea kipengelea B: Maono ya WMMC.

2. MISINGI YA IMANI YA WORLD MIRACLE MISSION CENTRE (FAITH STATEMENT)

WMMC ilianzishwa chini ya uongozi wa Roho Mtakatifu Mwaka 2006, Roho wa Mungu alimwongoza Askofu Justice Lutashobya katika Maombi ya siku 40, akaanda mkutano wa kuzindua huduma hii baada ya maombi, wadhamini na wadau wengine wa walihudhuria mkutano wa kwanza wa WMMC Pale Karimjee Dar es salaam tarehe 29, Septemba 2006. Mhasisi alipata Baraka za Askofu wake ambaye ni Katibu Mkuu wa CPCT, Bishop David Mwasota.

Kwa kuwa wadhamini walitoka madhehebu mbalimbali na tulitoka katika mapokeo mbalimbali, tulikubaliana kuacha mapokeo ya dini zetu za zamani, na katiba za dini zetu ili twende kueneza Injili ya Wokovu kwa kutumia Katiba Kuu ambayo ni Biblia. Tulisema tunavuka mipaka ya dini zetu na Kuvunja kuta za dini ili tuhubiri Injili kwa watu wote katika mataifa yote.

Msingi Mkuu wa WMMC ni INJILI NA UMISHONARI wa ndani na nje ya nchi; Hii inamaanisha kwamba WMMC ni HUDUMA YA KITUME. Umishonari ni AGIZO tena ni AGIZO KUU lilitolewa na mwenye kulianzisha kanisa yaani Bwana Yesu Kristo kama ilivyoandikwa katika **MATHAYO 28:19-20**.

Hivyo kwa ujumla WMMC inaamini katika IMANI NA NGUVU ZA KIPENTEKOSTE. Na katika Shule za huduma tumekuwa tukifundisha imani na Nguvu za kipentekoste kwa Moyo wote, kwa Nguvu zote; kwa Roho yote na kwa akili zetu zote; na mitaala ya mafundisho ya vyuo vyetu imeandaliwa kwa misingi ya Kipentekoste.

Mafundisho yetu (Doctrine), lazima yajikite katika kile tunachokiamini; Lazima yatokane na msingi wa Imani ya WMMC. Kila dhehebu lililosajiliwa linayo misingi ya imani ambayo imebeba mafundisho yao NA IMANI YAO. Hatuwezi kuamini katika Mungu wa Miujiza kwa mfano, halafu mafundisho yetu yanapinga Miujiza inayotakana na Mungu wetu!!!?

Hatuwezi kuamini katika Mungu wa Mitume na Manabii, Halafu mafundisho yetu yakapinga mitume na manabii! Hutuwezi kuamini katika Injili ya Uponyaji, halafu mafundisho yakapinga uponyaji Kwa Neno na Kwa matendo Yetu! Biblia inasema imani lazima ijieleze kwa NENO NA KWA TENDO (WAKOLOSAI 3:17).

LAKINI PIA HATUTATOA KIBALI ASILIMIA 100% KUFUNDISHA IMANI NA MAPOKEO YA MADHEHEBU AU HUDUMA ZINGINE, HATA KAMA NI YA KIPENTEKOSTE INAYOTOFAUTIANA NA WMMC. ISIPOKUWA IMANI YAO IWE INAFANANA NA YA WMMC AU INATOKANA NA BIBLIA.

Kwahiyo, yako mambo ya msingi katika imani ya kipentekoste ambayo tunayasimamia kama WAMISHONARI NA MITUME WA WORLD MIRACLE MISSION CENTRE katika siku hizi za mwisho kama ifuatavyo:

- 1) Tunaamini katika Wokovu wa Yesu Kristo ambao ni zawadi kwetu kwa njia ya Neema. Tumeokolewa kwa Jina la Yesu, kwa Toba ya dhambi tulizotenda,

tunaamini ya kwamba Yesu alisulubiwa na kufa msalabani ili sisi na watu wote wanaomwamini, wakombolewe kutoka dhambini. (**Matendo 4:12; ISAYA 53**)

- 2) *Tunaamini katika hatua tatu za wokovu: **Kuhesabiwa haki** baada ya kumkiri Bwana Yesu (**Warumi 8:11, 1Wakoritho 6:11**); **Kutakaswa** Baada ya Ujazo wa Roho Mtakatifu na Neno (**1Wakoritho 3:16, 1Wakoritho 6:19**) na **Kutukuzwa** wakati wa Parapanda itakapolia (**1Thesolonike 4:17**)*
- 3) Tunaamini katika huduma zote za Roho Mtakatifu, na Nguvu za Kipentekoste, Kulingana na kitabu chote cha **Matendo ya Mitume**; Hasa sura ya 1, 2, 3 na 9.
- 4) Tunaamini katika Nafsi Tatu za Mungu; yaani Utatu Mtakatifu; Mungu Baba, Yesu Kristo na Roho Mtakatifu. Kwamba Mungu Baba ni Mungu; Yesu Kristo ni Mungu na Roho Mtakatifu ni Mungu. (**1 Yohana 5:8; Luka 3:20, Isaya 9:6; Tito 2:13**)
- 5) *Tunaamini katika Huduma za Kitume, Kinabii, Kiinjilisti, Kichungaji na Ualimu kwamba kanisa haliwezi kushinda bila hizi huduma, kulingana na **WAEFESO 4:11**. Kanisa limejengwa chini ya misingi ya Kitume na Kinabii, ili kuvunja kazi za Ibilisi. (**1Yohana3;8**)*
- 6) Tunaamini katika mafunuo ya Roho Mtakatifu yanayothibitishwa na Biblia iliyoandikwa na yale yanayothibitishwa na Roho Mtakatifu na pia yale ambayo yatafunuliwa na kuthibitishwa na Roho wa Mungu. (**Yohana 21:25**)
- 7) Tunaamini katika Biblia Takatifu (Agano la Kale na Agano Jipya); Kwamba ni Neno la Mungu liloandikwa chini ya Uongozi wa Roho Mtakatifu, Likavuviwa kwa mafundisho, maonyo, kuelekeza, kuongoza watu wote waliokoka na wasiyookoka katika Wokovu. (**1 Petro 1:20-21**).Tunaamini ya kwamba Neno halina makosa na halishindwi (Infallible) na limehakikishwa na Roho Mtakatifu. (**Mithali 30: 5-6**)
- 8) Tunaamini kwamba Mafuta, Moto, Maji, Upepo, Njiwa , Mhuri na Kunena kwa Lugha mpya ni Ishara za Roho Mtakatifu kama ilivyoandikwa katika Biblia Takatifu Agano la Kale na Jipya. (**Matendo 2, Luka 3:22, 2 Wafalme1: 9-12 na 1Samweli 16:13-14**)
- 9) *Tunaamini katika Uponyaji wa Ki-Mungu, Tunaamini katika Mungu wa Miujiza na ishara zote za Roho Mtakatifu walizotenda manabii katika agano la kale na Jipya kwa kutumia Jina la Yesu na Nguvu za Roho Mtakatifu. (**Matendo 4:13-30**)*
- 10) Tunaamini katika ubatizo wa maji mengi kwa ajili ya toba (**Mark16:16**); Ubatizo wa Roho Mtakatifu kwa ajili ya Utakaso (**Matendo 2:2-4**); na Ubatizo wa Moto kwa ajili ya Nguvu za Kipentekoste.(**Matendo 2**).
- 11) *Tunaamini katika maombi ya kitume na kinabii kwa uongozi wa Roho Mtakatifu; kwa Jina la Yesu Kristo. Haya ni maombi ya kufunguliwa watu wenye*

vifungo hata baada ya kuokoka. (**YOHANA 11:44**).

- 12) Tunaamini katika Unyakuo wa wenye haki katika siku za mwisho, Ufufuo wa Wafu, Dhiki kuu kabla ya hukumu ya mwisho; na Kwamba baada ya hukumu ya wasiohaki, Wenye haki watarithi uzima wa milele katika Nchi na Mbingu Mpya (**Ufunuo 21**).
- 13) Tunaamini kwamba, Bwana Yesu atarudi tena mara ya Pili, Kwamba kila jicho litamwona; Kama alivyokuja mara ya kwanza kama mwanadamu, kwa kutungwa mimba ya Roho Mtakatifu ndani ya Bikra Mariamu, akasulubiwa, akafa, akazikwa na kufufuka siku ya tatu kutoka kwa wafu, akajidhihirisha kwa wanafunzi wake siku 40; akapaa mbinguni mbele ya wanafunzi wake. (**Matendo 1:11**)
- 14) Tunaamini kwamba Kanisa ni mwili wa Kristo na Bibi arusi wa Bwana Yesu, ambaye amepewa agizo la kupeleka injili kwa watu wote; katika lugha, kabila na mataifa yote na kuwafanya kuwa wanafunzi wa Yesu. (**Mathayo 28:19-20**)

3. **MWONGOZO WA MAKANISA**

Kwa mujibu wa katiba ya WMMC, mwongozo wa makanisa yanayopandwa unaandaliwa kulingana na ibara ya 12.2 (2) :

“Huduma za Kiroho kama Kupanda makanisa; zitaendeshwa kwa kufuata mwongozo, Sheria na Kanuni zitakazotungwa na Wadhamini Wahasisi wa Asasi hii kulingana na malengo ya Asasi, Misingi ya Umishonari na Misingi ya Imani ya Wokovu kwa mujibu wa Ibara ya 3 ya katiba hii.”

Kwa ufupi, kwa kuwa huduma yetu inazingatia na inaamini katika huduma tano za Roho Mtakatifu kama ilivyoandikwa katika WAEFESO 4:11, lazima kuwa na mwongozo kwa wachungaji wa makanisa yetu katika kila kijiji, Kata, Tarafa; Wilaya, Mikoa na Taifa kwa ujumla. WMMC muundo wa uongozi wake kulingana na ibara ya 12 ya katiba utakuwa kama ifuatavyo:

I. UONGOZI KITAIFA NA KIMATAIFA

Uongozi wa kitaifa na kimataifa wa WMMC utateuliwa na uongozi wa juu kutoka makao makuu Dar es salaam, kwa mujibu wa katiba Ibara ya 12(8) Raisi/ Askofu Mkuu ndiye mwenye Mamlaka ya Mwisho kuteua viongozi wa kitaifa na Kimataifa.

Uongozi wetu kitaifa na Kimataifa kwa sasa ni kama ifuatavyo:

- 1) Bodi ya Wadhamini (Wahasisi):
Wako 5, waliosajiliwa na RITA. Rejea Katiba ibara ya 16.
- 2) Mwenyekiti / Raisi (President) ambaye ataitwa Askofu Mkuu ni
Mch. Justice Lutashobya, kwa mujibu wa ibara ya 12. 8 na 12.4.4

- 3) Bodi ya Wakurugenzi;
Wako 7, Rejea Katiba ibara ya 12.
- 4) Makamu Mwenyekiti/ Raisi: *Nafasi hii iko wazi haijapata mtu.*
- 5) Katibu Mkuu:
Adelina Rwezaula, kwa mujibu ibara ya 12.9
- 6) Mhasibu Mkuu (Hazina)-
Joyce Ngara, Kwa mujibu wa ibara 16
- 7) Mratibu Mkuu-
Mwl. Obedi Karoli
- 8) Waratibu wa Huduma za Kiroho na Jamii-
Hawajateuliwa
- 9) Maaskofu wa Kanda-
Hawapo wanatakiwa kuteuliwa

II. UONGOZI WA KANISA LA MAHALI PAMOJA

Makanisa ya WMMC yalikuwa hayana mwongozo wa huduma kikanisa, wakati yanaanzishwa. Lakini baada ya mkutano mkuu, uliofanyika **Tarehe 10-08-2016** Geita, Bukombe Askofu Mkuu pamoja na wajumbe walipendekeza kuchagua au kuwateua viongozi katika idara mbalimbali kulingoza kundi.

Uongozi wa HUDUMA ZA KIROHO na HUDUMA ZA JAMII utapatikana kwa mujibu wa katiba ya WMMC ibara 12(11). Uongozi wa Kanisa la Mahala pamoja utateuliwa na mchungaji Kiongozi kwa vigezo na sifa zilizotajwa katika ibara 12(11) ya katiba.

Mchungaji kiongozi atawajibika kuunda idara katika kanisa la WMMC, kisha ataleta ripoti ya majina makao makuu, kwa ajili ya kusimikwa na kuwatambua. Muundo wa uongozi wa kanisa utakuwa kama ifuatavyo:

1) Mchungaji kiongozi:

Atakuwa ndiye mtendaji mkuu katika kanisa ambaye atawajibika kwa mambo yote yanayohusu huduma ya kanisa la mahala pamoja (Local Church). Majukumu yake yatakuwa kama ifuatavyo:

- a) Mchungaji Kiongozi lazima awe na cheti cha Agizo Kuu la WMMC, ambacho kitatolewa na Askofu Mkuu baada ya kumsimika na kupewa kitambulisho cha Miaka 3.

- b) Baada ya Miaka 3 atapewa cheti cha msimikwa, Kinachompa Mamlaka ya kutenda maono saba , pamoja na kubatiza na Kufungisha ndoa.
- c) Yeye atakuwa ndiye mwenye maono juu ya lile kanisa, kuhakikisha linalikua, linazaa, linamtangaza YESU, na kutoa ushuhuda kwa Nguvu za Roho Mtakatifu ili watu waendeleo kuokoka.
- d) Atawajibika kuunda Idara za Kanisa kwa maelekezo ya Askofu Mkuu au mwenyekiti.
- e) Atakuwa mwangalizi wa matawi yote yatakayofunguliwa kutoka kanisa mama.
- f) Ndiye atakaye andaa mikutano ya Injili, Shule za Huduma, Makongamano; Maombi na umishonari katika eneo lake.
- g) Atajenga jeshi la Mitume, Manabii, wachungaji, Wainjilisti na Waalimu kwa kusudi la WMMC kwa kutumia shule za huduma za musimu.
- h) Anatakiwa kuwa na sifa ya kulisha kondoo, Kuchunga kondoo, na kuongoza kundi; kiroho na kimwili. WMMC inaamini Mchungaji ni mchungaji wa watu wote.
- i) Mchungaji lazima awe mwenye Roho ya Kalvari, aliyejikana na ajue wito wake vizuri.
- j) Mchungaji ndiye atakayesimamia miradi yote ya jamii kulingana na katiba ya WMMC iliyoanzishwa na Kanisa analolichunga.
- k) Lazima afanye mipango ya kufungua shule miaka 3 baada ya kuanzishwa kwa kanisa.
- l) Ataongoza Umishonari wa Kijiji, Kata, Tarafa, Wilaya na Mkoa.
- m) Mchungaji kiongozi anaweza kuunda baraza la wachungaji wasaidizi au kuteua wachungaji wasaidizi zaidi ya wawili.
- n) Mchungaji Kiongozi ataitwa Askofu wa Mkoa au Kanda; baada ya Kujenga jeshi la Mitume, manabii, Wainjilisti, wachungaji na waalimu, na kupanda makanisa ya kimishonari zaidi ya Matatu yenye washirika zaidi ya 70. Rejea kipengele nambari 6 cha Mwongozo wa kupanda makanisa.
- o) Kanisa au makanisa yanayosimamiwa na mchungaji kiongozi lazima yatoe Fungu la Kumi kwa mujibu wa Ibara ya 11 ya katiba ya WMMC na sadaka ya umisheni ya kila mwezi kwa mujibu wa kipengele namba 8 Cha Mwongozo wa Kupanda Makanisa.
- p) Kwa wachungaji wanaojiunga na Huduma ya WMMC kutoka madhehebu au huduma nyingine, wanatakiwa kusaini mkataba wa miaka mitatu baada ya

kuwasilisha barua ya kuaga na makabidhiano kwa dhehebu, kanisa au huduma anakotoka. Mratibu mkuu atatumia taarifa za wachungaji wanaoijiunga na atatuma kopi kwa Askofu Mkuu.

- q) Kabla ya kusaini mkataba atapewa katiba ya WMMC, Mwongozo Nambari 1 (Huduma ya Kupanda Mkanisa) au Mwongozo 2 (Huduma za Jamii); ili ajiridhishe kwamba ataweza kutumika na WMMC. Lakini pia ni vizuri kujua tunaamini nini.
- r) WMMC itaomba kupata ripoti ya Historia ya mchungaji kuhusiana na huduma; kwa wale wanaomba kujiunga na huduma ya Umishonari..
- s) Baada ya Kusaini mkataba kutumika na WMMC, atawajibika kutetea na kulinda Maono, Kusudi, dhamira, Dira na Misingi ya Imani ya WMMC kwa mujibu wa Kipengele namba 2 cha Mwongozo wa Kupanda Mkanisa.
- t) Kila kanisa la WMMC linatakiwa kuandaa timu ya wamishonari wa ndani na Nje ya Mkoa, na hatimaye kwa taifa na kimataifa. Rejea kipengele nambari IV- Mwongozo kwa Wamishonari na katiba Ibara ya 3 na 4.

2) Mchungaji Msaidizi/ Wasaidizi

- a) Mchungaji Msaidizi atateuliwa na Mchungaji kiongozi kwa uongozi wa Roho Mtakatifu na Maombi na Kufunga siku 3.
- b) Ataripoti na kupokea maelekezo kutoka kwa Mchungaji kiongozi.
- c) Mchungaji Msaidizi anaweza kuwa mama mchungaji na iwapo mchungaji hajaoa au hana mke basi kipengele (d) kitatumika kumpata mchungaji au wachungaji wasaidizi.
- d) Wachungaji wasaidizi watatokana na Huduma ya Utume, Unabii, Uinjilisti, Uchungaji na Mwalimu (WAEFESO 4:11), walioitwa na wana nguvu za Mungu.
- e) Wachungaji wasaidizi watatambuliwa na WMMC baada ya kupita kwenye shule ya Huduma, na kupewa vyeti vya kumaliza Shule ya Huduma (Certificate of Completion). Wachungaji wengine watatambuliwa baada ya kutumika na WMMC kwa Muda wa Miaka 2. Askofu Mkuu ataandaa siku ya kuwasimika wachungaji wasaidizi.
- f) Wachungaji wasaidizi ndiyo mitume, manabii, wainjilisti, wachungaji na waalimu. Hawa huduma yao kubwa ni kupanda makanisa na kusimamia huduma za jamii kwa usimamizi wa Mchungaji Kiongozi.

3) Idara Za Kanisa

Mchungaji kiongozi akishirikiana na Uongozi wa WMMC pamoja na Mchungaji msaidizi ataunda Idara za kanisa mwaka mmoja baada ya kupanda Kanisa au kukabidhi kanisa kwa WMMC. Idara zifuatazo za kanisa zitaundwa kwa mujibu Katiba Ibara ya 12(11) kwa ajili ya utawala na Uongozi wa kanisa:

- a) Idara ya Fedha
- b) Utume na Umishonari
- c) Mashemasi
- d) Idara za Wa mama
- e) Idara ya Maombi na Maombezi (Viongozi wa sifa + Ibada)
- f) Idara ya Watoto
- g) Idara ya Ujenzi
- h) Idara ya Huduma za jamii

III. MWONGOZO WA HUDUMA YA KIMATAIFA

Huduma ya Mekanisa katika ngazi ya kimataifa itafuata muundo wa Uongozi kama ilivyo kwenye katiba ya World Miracle Mission Centre ibara ya 12.

Uongozi wa kimataifa utateuliwa na uongozi wa juu kutoka makao makuu Dar es salaam, Tanzania kwa mujibu wa katiba Ibara ya 12(8) . Kikatiba, Raisi/ Askofu Mkuu ndiye mwenye Mamlaka ya Mwisho kuteua viongozi wa kitaifa na Kimataifa.

Kwa huduma ambazo zimeomba kujiunga na World Miracle Mission Centre kutoka nchi zingine au Kuomba ubia wa kufanya Huduma pamoja na WMMC, utaratibu ufuatao utafuatwa:

- 1) Kanisa au huduma kutoka nchi nyingine itaomba kwa barua ya kujiunga au kuanzisha uhusiano wa kihuduma pamoja na WMMC, itumwe makao makuu ya Huduma kwenda kwa Raisi/ Askofu Mkuu wa Huduma.
- 2) Ndani ya Siku saba Raisi/Askofu Mkuu wa Huduma ya WMMC atajibu barua ya kujiunga nasi kutoka huduma nyingine, ng'ambo ya Tanzania.
- 3) Katika Barua Askofu Mkuu ataomba vielelezo na ripoti ya kanisa linalotaka kujiunga.
- 4) Baada ya Kupata Ripoti ya Mchungaji au Askofu wa Kanisa/ huduma inayoomba kujiunga na WMMC; Raisi/ Askofu Mkuu atatuma nyaraka 3 kwa Kanisa au huduma ya kimataifa; *Katiba, Mwongozo Nambari 1 (Huduma ya Kupanda Mekanisa) na Mwongozo nambari 2 (Huduma za Jamii).*
- 5) Baada ya Huduma ya kimataifa kukubaliana na kujiridhisha na huduma yetu, WMMC makao makuu wataandaa nyaraka zifuatazo kwa Kanisa na Huduma ya

kimataifa kwenda nchi nyingine.

- a) *Kivuli cha Hati ya usajili ya WMMC*
 - b) *Hati ya Ubia kati ya WMMC na Huduma ya Kimataifa Certificate of commission au Cheti cha Agizo Kuu.*
 - c) *Mkataba wa Huduma/ubia/udau wa kisheria ulioshuhudiwa na mwanasheria kwa miaka mitatu. Baada ya Mitatu hapo Kanisa au Huduma itakuwa imethibitishwa.*
 - d) *Kivuli cha Katiba ya WMMC kwa ajili ya mwongozo.*
 - e) *Barua ya Utambulisho kwa Wizara ya Mambo ya ndani ya nchi hiyo.*
 - f) *Vitambulisho (IDS) kwa Mchungaji/Askofu*
- 6) Mchungaji au Askofu wa Kanisa katika nchi Nyingine ndiye atakuwa kiongozi mkuu, Mtendaji Mkuu na Balozi atakayewakilisha Huduma ya WMMC katika nchi hiyo, kwa ushirika na Makao Makuu.
- 7) Kanisa au Huduma au Taasis inayotumia mwavuli wa WMMC, kwa huduma za kimataifa, itawajibika katika kuandaa mikutano, Shule za huduma za kimataifa, semina na Makongamo mbalimbali kwa ushauri wa Makao makuu.
- 8) Ni muhimu sana kwa Kanisa au Huduma iliyojiunga na WMMC kutoka nchi nyingine, Kufuata sheria za nchi anapofanya huduma ili kuzuia migogoro ya kisheria inayoweza kujitokeza. Kila nchi inazo sheria zake kwa habari ya huduma na Umishonari.
- 9) WMMC inashauri Kanisa au Huduma ya Kimataifa kulipa mafungu ya kumi na Sadaka ya Umisheni kwa Mujibu wa katiba ya WMMC; kwa sheria ya Roho Mtakatifu na siyo kwa shuruti.
- 10) WMMC inayo shauku na furaha katika Roho Mtakatifu kuwakaribisha MITUME, MANABII, WAINJILISTI, WACHUNGAJI NA WAALIMU kutoka nchi zote duniani kufanya kazi ya Mungu pamoja nasi. MILANGO IKO WAZI.
- 11) Kanisa la Kimataifa linatakiwa kuandaa wamishonari wa ndani ya nchi kanisa lilipo na nje ya nchi, kwa mawasiliano na WMMC Makao makuu kwa kuzingatia Misingi ya Umishonari kikatiba, ibara ya nne (4) na kipengele nambari IV- mwongozo kwa wamishonari.

IV. MWONGOZO KWA WAMISHONARI WA KITAIFA NA KIMATAIFA

Huduma ya Umishonari na Uinjilisti katika ngazi ya kitaifa na kimataifa itafuata muundo wa Uongozi kama ilivyo kwenye katiba ya World Miracle Mission Centre Ibara ya 12(8) . WMMC inao wamishonari wa kudumu katika huduma, na pia wapo wamishonari wa muda mfupi kulingana na uhitaji wa mikutano na huduma kwa ujumla.

Kwa wamishonari wanaoomba kujiunga na World Miracle Mission Centre kutoka Mekanisa mengine, Huduma zingine, madhehebu mengine na nchi zingine au Kuomba ubia wa kufanya huduma pamoja na WMMC, wasifu, sifa, masharti na vigezo vifuatavyo vitazingatiwa:

- 1) Wamishonari na Wainjilisti wa kudumu na wale wa muda mfupi wanatakiwa kuhudhuria shule za huduma za WMMC zile za muda mfupi; kisha watapewa vyeti.
- 2) Wamishonari / Wainjilisti wa kudumu watasimikwa na Kupewa vyeti na vitambulisho Baada ya kufanya huduma na sisi katika viwanja vya umisheni kwa muda wa mwaka 1 hadi 2 kulingana na idadi ya misheni atakazohudumia.
- 3) Wamishonari wanaotoka makanisa mengine ndani na nje ya nchi na wanaotaka kujiunga na moja kwa moja na WMMC watafuata hatua katika mwongozo wa huduma ya kimataifa, kipengele nambari tatu (III).
- 4) Wamishonari wote wawili wanatakiwa kuthibitishwa kwa kuangalia kama wanaweza kufanya kazi katika mazingira yoyote. Wamishonari wa WMMC lazima wapitie kipimo cha kushinda vikwazo vya mazingira.
- 5) Kwa Wamishonari wanaoogopa mazingira ambayo wengi wanasema siyo rafiki basi hao hawataweza kufanya kazi na WMMC. Kipimo kikubwa kwa wamishonari wa WMMC ni mazingira magumu na wakati mwingine ni hatarishi. Kwa mfano wamishonari wanaokaa mjini wanaoogopa mazingira ya kufanya umishonari vijijini kwa sababu hakuna huduma za jamii kama mjini.
- 6) WMMC inaamini unapotumwa kufanya umishonari kijijini uwe kama wanakijiji ili yumkini wampate Kristo wetu. Chakula, maji na matunda, mavazi, malazi na Nyumba wanayotumia lazima na wamishonari wetu watumie. Angalizo ni kwamba usiige utamaduni wao wa dhambi na ibada za mizimu, sanamu na ibada za wafu.
- 7) Ikumbukwe kuwa UMISHONARI NI UTUME, na utume mara nyingi unaambatana na hatari nyingi katika utendaji kama zile alizokabiliana nazo Mtume Paulo katika (**2 WAKORINTHO 11:23-28**). Kama unaomba kujiunga na WMMC kwa misingi ya fedha na maisha yako binafsi, WMMC inakupa pole na siyo chaguo sahihi kwako.
- 8) WMMC inaamini wamishonari wanatakiwa kupenda wenye dhambi, siyo kuwachukia wenye dhambi, lakini siyo kupenda dhambi wanayoitenda. Kuvutwa na dhambi wenyeji kwa wamishonari ni uasi mkubwa mbele za Mungu.
- 9) Lazima wamishonari wa WMMC wajifunze kutatua matatizo ya watu. Huduma yoyote ni kutatua matatizo ya kiroho, kifedha, kijamii na kisaikolojia. Katiba yetu inaonyesha matatizo haya kwenye dibaji.

- 10) WMMC inaamini na Biblia inathibitisha kwamba YESU NI MMISHONARI WA KWANZA KUTOKA MBINGUNI, alikuja umisheni Duniani na Kuzimu. Kazi yake kubwa alikuja kutatua MATATIZO MATATU: **KIFO; DHAMBI NA MAGONJWA.**
- 11) Wamishonari wawe na uwezo wa kutembea katika ROHO YA KALVARI: Kubeba msalaba; kusulubiwa yeye mwenyewe na kusulubisha dhambi za watu; kutembea bila maji ya kunywa, chakula, malazi na pesa kwa muda mrefu katika viwanja vya umisheni (**MATHAYO 10: 9-10**). Kipimo kikubwa kwa wamishonari wa WMMC ni kufunga na kuomba.
- 12) Wamishonari wote wa kimataifa itakuwa ni vema na agizo kuhakikisha wanashughulikia kupata pasipoti ya Tanzania kwa safari za umisheni wa nje ya nchi ya nchi.

V. VIKAO VYA HUDUMA YA WMMC

Vikao vya Huduma vitafanyika kwa mujibu wa ibara ya 12(3) na 12(4) ya katiba ya WMMC. Vikao Vikuu vya Huduma Kitaifa na Kimataifa vitakuwa ni:

- 1) Mkutano Mkuu (Kitaifa na Kimataifa)
- 2) Mkutano wa Bodi ya Wadhamini
- 3) Mkutano wa Bodi ya Wakurugenzi
- 4) Kamati za Mikutano ya Injili na Jamii

VI. VYETI VYA UTAMBULISHO KWA WACHUNGAJI

Vyeti vya Utambulisho vitawapa wachungaji wanaojiunga na WMMC mamlaka katika eneo la makanisa na Uongozi wa serikali. Askofu Mkuu ataandaa nakala za vyeti hivi kwa uongozi wa Roho Mtakatifu. Na gharama ya uchapaji inahitajika kama TSH. 2,000. Utambulisho utakuwa kama ifuatavyo:

- 1) Vyeti vya utambulisho vya WMMC vitaitwa CERTIFICATE OF COMMISSION (Vyeti vya Agizo Kuu kwa wachungaji ambao wanasubiri kuthibitishwa kabla ya miaka mitatu)
- 2) Vyeti vya Wachungaji waliothibitishwa wanaosubiri kusimikwa CERTIFICATE OF COMMISSION, ndani ya miaka mitatu.
- 3) Vyeti vya msimikwa vitatolewa baada ya Miaka mitatu (3) hadi Minne (4) kwa wachungaji waliotumika WMMC kwa uaminifu. Vyeti hivi vitajulikana vitaitwa ORDINATION CERTIFICATE.
- 4) WMMC itatoa vitambulisho kwa kikomo cha mwaka Mmoja(1) kwa wale ambao hawajathibitishwa na wale ambao wamethibitishwa miaka 3.

4. ROHO YA HUDUMA ZA WMMC

World Miracle Mission Centre, **SIYO DHEHEBU WALA DINI, USAJILI WAKE NI WA SHIRIKA LA KIMISHONARI NA UINJILISTI, DUNIANI.** WMMC LITAKUWA SHIRIKA KUBWA DUNIANI, LENYE JESHI KUBWA LA MITUME, MANABII, WAINJILISTI, WACHUNGAJI NA WAALIMU LENYE NIA MOJA NA ROHO MOJA JUU YA UTUME.

- 1) Askofu Mkuu anatoa wito kwamba watumishi wa WMMC wasiache maono, imani, malengo na kusudi la huduma hii. Huduma kuu siyo kumiliki na kupanda makanisa na kuvuna sadaka. **SHABAHA YA KWANZA YA WMMC NA MAONO MAMA NI KUHUBIRI INJILI NA SIYO KUMILIKI MAKANISA. HUDUMA AMBAYO NI NGUZO YA WMMC NI UTUME NA INJILI DUNIANI.**
- 2) Kwa mujibu wa Misingi ya Umishonari kikatiba, Wachungaji wanatakiwa kujua kwamba Makanisa yanayopandwa na WMMC ni makanisa ya Umishonari; Ingekuwa heri watu kanisani wakitwa Wamishonari, Mitume, Manabii, wainjilisti, Wachungaji na Waalimu. Kimsingi hatuhitaji washirika wanaokoka na kukaa kwenye benchi au kiti kila ibada miaka nenda miaka rudi. Tunayo shauku kila mshirika kutoka makanisa ya WMMC aende ulimwenguni kueneza, kutetea na Kulinda imani ya Injili (**HESABU 11:29; MATHAYO 28:19-20**)
- 3) Kwa mujibu wa katiba, WMMC inafungua milango ya ushirika wa madhehebu na makanisa mengine yote bila kujali dini, kanisa, wala dhehebu, kabila, rangi wala taifa. Kimsingi, ulazima wa kupanda makanisa ni kwa ajili ya KULEA NA KUONGOZA MAKANISA AMBAYO YAMECHOKA NA KUTA ZA DINI NA UDHEHEBU. Hatupandi makanisa kwa malengo ya sadaka na mafungu ya kumi. Tunapanda makanisa kujenga jeshi la Utume wa siku za mwisho, lenye nguvu ya kuvunja ngome ya shetani Tanzania na Ulimwengu.
- 4) WMMC ni kwa ajili ya KUHUDUMIA MADHEHEBU YOTE YA KIPENTEKOSTE NA INJILI PEKEE KWA MAKANISA YASIYO YA KIPENTEKOSTE. Tumetumwa kuhibiri Injili kwa watu wote, kabila zote, dini zote na mataifa yote. Hatuna misingi ya udini; udhehebu, ukabila, rangi na taifa. Kazi yetu ni kuwatoa watu kwenye dhambi ili watakaswe na ili waingie mbinguni.
- 5) WMMC itaendelea kuongozwa na ROHO MTAKATIFU; NENO AU BIBLIA NA KATIBA. Kwa sababu katiba imebeba sheria ya Nchi kwa sehemu kubwa; Mwongozo wa huduma; na Kanuni za kuongoza watu WAAMINIO NA WASIYOAMINI. SHERIA KAMILI YA ROHO MTAKATIFU AMBAYO NI SHERIA YA KRISTO IKO KWENYE BIBLIA NA ROHO MTAKATIFU.
- 6) WMMC inatambua na inajua jinsi gani watumishi wa Mungu walivyochoka na mifumo mibaya ya kidini na kidhehebu, kimafundisho na kikatiba.
- 7) Raisi na Askofu Mkuu wa WMMC anatoa angalizo kwa wachungaji na Mitume wanaojiunga na Huduma yetu ya WMMC; kwamba, kila kanisa, huduma au dhehebu lina UZURI wake na UDHAIFU wake. Hukuna huduma, dhehebu au kanisa ambalo utakuta kwamba ni asilimia 100% linafanya huduma kama YESU

alivyofanya. Ni kweli Yesu alisema tutafanya kazi kubwa kuliko alizofanya. Ina maana tunatakiwa kufanya asilimia 110%, 120% 150% Lakini sina uhakika kama hata 5% ya kazi ya Mungu tunafanya. Najua hatujafikia hapo kwa sababu ya madhaifu ya **KIDINI, KIKATIBA, MAFUNUO NA KIMAFUNDISHO**.

5. MIKUTANO YA INJILI KILA MWAKA

Kwa mujibu wa maono ya WMMC Kikatiba, Mikutano ya injili na Umishonari ndiyo Agizo Kuu la WMMC. Tunaendesha mikutano ya kitaifa na Kimataifa kwa kufuata Uongozi wa Roho Mtakatifu na Kalenda ya Mwaka. Mikutano yetu ni pamoja na Mikutano ya hadhara yaani crusades; Mikutano ya ndani yaani Semina; Mbio za Kinabii na Kitume; Semina za maombezi; Mikutano ya maombi; Shule au vyuo vya Huduma vya musimu.

Mwaka 2006, tulianza shule ya kwanza ya huduma kwa wachungaji wa madhehebu yote, pale Karimjee, Dar es salaam, Tanzania; wakati wa Uzinduzi wa huduma. WMMC kwa mujibu wa ibara 2 hadi 3, inaandaa na kuendesha shule za huduma bila kuta katika vijiji, miji, majiji na mataifa.

Kuanzia mwaka 2007, tuliweka programu ya kitaifa na Kimataifa kufanya mikutano zaidi ya 40 kila mwaka kwa Tanzania, mkoa kwa mkoa. Na mikutano ya kimataifa WMMC itafanya mikutano zaidi 3 kila mwaka kulingana na uongozi wa Roho Mtakatifu.

1) Mikutano ya Nje yaani (Crusades)

Mikutano ya Injili inafanyika mara nyingi wakati wa kiangazi mwezi wa Juni na Julai kwa Tanzania, kulingana na uzoefu kwa mujibu wa Mwongozo wa WMMC.

Mwaka 2010, tulianza kuweka uongozi wa mikutano vizuri, Kwa kuweka ratiba na Maombi. Mwanzoni tulianza kwa kufadhili mikutano asilimia 100%, kwa sasa WMMC inawashirikisha na kuhamasisha wachungaji wa makanisa kuchangia gharama za mkutano kwa kiasi kikubwa.

Kuanzia Mwaka 2011 WMMC ilianza kuhamasisha fedha ya Mikutano wakati wa semina za Pasaka Mwezi Aprili, ili tupate picha ya mzigo walionao kanisa kwa ajili ya mkutano mwezi June na Julai. Wachungaji wa makanisa wanatakiwa kuanza maombi ya kufunga miezi 7 kabla ya kuanza maandalizi ya mkutano. Baada ya Maombi, WMMC inashauri ndipo bajeti iandaliwe kwa ajili ya mikutano ya Injili. Na Uongozi wa WMMC utaratibu shughuli zote za maandalizi kutoka makao makuu, Dar es salaam, Tanzania

WMMC inaamini maombi ya kufunga ndiyo yenye nguvu kukamilisha maandalizi ya mkutano. Pasipo Maombi ya kufunga kwa Mchungaji na Watendakazi kwa kanisa wenyeji wa mkutano, WMMC haiwezi kuja kufanya mkutano wa nje.

Bajeti ya gharama za mikutano yetu ni pamoja na Safari za Wahubiri, Matangazo; Chakula, Simu, Majukwaa, Vyombo vya kuhubiria; pamoja na posho za wahubiri wanapomaliza Mikutano. Ni jukumu la wachungaji kuandaa bajeti kwa ajili mkutano miezi 3 hadi 7 kabla ya mkutano wa injili.

Kabla ya mkutano, ratiba iandaliwe na mchungaji mwenyeji inayoonyesha shughuli zote za mkutano na timu inayohusika. Matangazo yatafanyika mwezi mmoja kabla ya mkutano kuanza; kwa njia ya redio, televisheni au Karatasi za kubandika wiki moja kabla ya mkutano; na kila siku kwa njia ya redio au megafoni.

Ni vema kabla ya mkutano, wachungaji kuomba vibali vya polisi au Uongozi wa kijiji kama viwanja vitakavyotumika ni vya serikali. Kwa makanisa yanayofanya mikutano katika viwanja vya kanisa, basi wanatakiwa kuandika barua ya kutoa taarifa za mkutano kwa uongozi wa kijiji eneo hilo. WMMC itatuma Mratibu wa Injili na Umishonari kuratibu na kuripoti shughuli zote za maandalizi ya mkutano, wiki 3 kabla ya mkutano kuanza.

Wakati wa mikutano, Wachungaji lazima waandae Timu ya Kuombea mkutano unapoendelea, Timu ya Maombezi baada ya mhubiri kumaliza ujumbe wa Injili; Timu ya Sifa na kuabudu, Timu ya Usalama wa Mkutano; Timu ya Kuwahudumia wahubiri kwa habari ya Chakula, Malazi, Maji ya kuoga kabla na baada ya mahubiri; Sehemu zingine timu ya usafiri kutoka eneo la mkutano kwenda mahala pa kupumzika.

2) Semina za Ndani kwa Watu Wote

Semina za ndani kwa mujibu wa Mwongozo wa WMMC, zinafanyika mara nyingi kwa kipindi cha mvua kwa hapa Tanzania, na Baridi kwa huduma za kimataifa. Mwaka 2010, tulianza kuweka mwongozo mpya, kwamba kila mikutano ya nje inapofanyika lazima na semina za wahongofu na washirika katika kanisa lililofanya mikutano ya nje ifanyike. Ni kweli tumekuwa tukifanya hivyo, lakini bado kuna uhitaji wa huduma ya semina kwa wiki hata mara tatu baada ya mikutano, ili kuweka misingi mizuri kwa waliookoka.

Tumekuwa tukishuhudia wahongofu wapya hawaendelei na imani ya wokovu baada ya mikutano. Katika baadhi ya makanisa tulikuwa tukihubiri watu wanaoookoka kuanzia 200 hadi 300 kwa kituo kimoja cha mkutano; lakini wanaobatizwa na kuendelea na Imani unakuta wako 5 au hakuna katika kituo hicho. Hii inaonyesha kwamba malezi ya wahongofu wapya ni hitaji kubwa baada ya mikutano ya nje, kupitia semina za mara kwa mara.

3) Shule za huduma

Mwaka 2006, tulianza shule ya kwanza ya huduma kwa wachungaji wa madhehebu yote, pale Karimjee, Dar es salaam, Tanzania wakati wa Uzinduzi. WMMC kwa mujibu wa ibara 2 hadi 3, inaandaa na kuendesha shule za huduma bila kuta katika vijiji, miji, majiji na mataifa.

- a) Maandalizi yanafanywa na wachungaji wenyeji bila kujali dini wala dehebu kwa kuleta maombi ya kuendesha shule ya huduma kwa WMMC miezi 7 kabla ya Shule.

- b) Baada ya kupokea maombi ya Wachungaji, WMMC inaomba bajeti ya Shule, kwa kuzingatia idadi ya watumishi watakaohudhuria.
- c) Mara nyingi, WMMC inachangia asilimia 70% ya Shule, kwa muda wa kuanzia siku 4-7.
- d) WMMC hufanya shule za huduma kila mwaka kuanzia shule 3 au zaidi. Na walengwa ni Wachungaji, Mitume, Manabii, Wainjilisti, Waalimu, Wazee wa Kanisa, Mashemasi; Viongozi wa Kanisa katika idara mbalimbali na Washirika ambao wanasikia wito wa kumtumikia Mungu katika kiwango cha juu.
- e) Tunatumia mtaala wa Chuo uliondaliwa na Mhasisi wa Huduma ya WMMC kwa ushirikiano na Walimu waliojaa Roho Mtakatifu.
- f) Baada ya Mafunzo ya shule ya Huduma, Ni wajibu wa WMMC kutoa Vyeti kwa wahitimu. Vyeti vinatolewa kwa wale watumishi waliohudhuria muda wote wa shule.
- g) WMMC itaanzisha Mitihani kabla ya Kutoa vyeti kwa wahitimu, ili kuleta maana halisi ya Shule au Chuo Cha Huduma, hasa kwa vijana walioitwa kutoka makanisani.
- h) WMMC inatoa wito kwa wachungaji wa madehebu yote, kwamba ingekuwa heri kama watu wote wa Mungu wangukuwa manabii na Bwana akawatia Roho Wake (**HESABU 29:11**). Washirika wote katika kanisa la kwanza walitenda kazi kwa pamoja na Roho Moja. (**MATENDO 4:32-37**).
- i) WMMC inawapenda wachungaji na Watumishi wa madhehebu, kabila, taifa na Lugha zote kuhudhuria shule zetu za Huduma. Wachungaji wenyeji wa mikutano yetu tunawashauri kualika na kukaribisha watu wote wa Mungu katika maeneo yao shule ya huduma inapoandaliwa.
- j) Kwa MITUME WA WMMC, *udini, udhehebu, Uherode, Ufarao, usadukayo, ufarisayo, ubaguzi wa rangi na kabila* ni dhambi kubwa maana roho hizi zinazuia Injili na Umishonari.
- k) Wingu la Roho Mtakatifu linaposhuka katika shule ya huduma, tunapenda watu wote wa Mungu liwafunike, wabatizwe katika wingu; watabiri, Wanene kwa Lugha, waombe, na kupokea mafunuo kwa pamoja katika Roho wa Kristo. Mbingu zitafunguka na watu wa Mungu watapewa nguvu za kutembea mwendo mrefu katika huduma mbele ya safari zao.
- l) Vyu vyetu na shule zetu za huduma za WMMC, vinafanya kazi kama chuo cha Nabii Samweli katika (**1 SAMWELI 19: 18-24**). Kazi yetu kubwa ni kuwachomoa wapakwa mafuta (*akina Daudi*) mikuki waliochomwa na *akina Sauli, na kuhakikisha tunawapaka mafuta ya kitume na kinabii upya, ili waende kutabiri juu ya taifa, kabila na lugha.*

4) Kalenda ya Mwaka

Mwaka 2010, Bodi ya WMMC iliona ni vyema kuandaa kalenda vizuri ya mwaka na Timu 3 za umisheni. Timu ya kwanza ipite kwa ajili ya Crusade Mwezi wa saba na nane; timu ya Pili ipite baada ya Mikutano kwa semina za ndani; pamoja na Ubatizo.

Mchungaji Lutashoby na wamishonari wengine wa WMMC walianza programu yakufanya mikutano kwa kalenda ya mwaka tangu mwaka 2007 hadi leo. Mchungaji Lutashoby kuanzia Mwezi Machi 2016 hadi Mei 2 alikuwa akipita kijiji kwa kijiji; Mji kwa mji akifanya semina za ndani na kubatiza. Operesheni hii ilibatizwa jina la MBIO ZA KINABII.

Mpango huu ni hatua endelevu baada ya mkutano mkuu uliofanyika Bukombe, Geita. Timu ya Tatu ni ile Shule ya Huduma kwa watumishi wenye mzigo wa Huduma na Injili.

Ratiba ya kila Mwaka

Mwezi	Muda	Mkutano	Wahubiri
Januari-Machi	wiki 3	Semina za Ndani na Ubatizo	2-3
Aprili	wiki 1	Shule za Huduma na Chuo	2-4
Juni	Wiki 1	Semina za maombi kwa ajili ya Mikutano ya nje	2-3
Julai-Agosti	Wiki 2	Mikutano ya Nje na Chuo	5-10
Desemba	wiki 1	Semina za Ndani na Ubatizo	2-3

5) Fedha za Mikutano ya Injili

Fedha za mikutano ni changamoto tangu huduma ya WMMC ianze mwaka 2006. Uongozi wa World Miracle Mission Centre unashauri makanisa yote kufuata utaratibu huu kwa ajili fedha za mikutano:

- Pamoja na wadhamini wa WMMC Makao makuu kufadhili mikutano ya Injili, Makanisa yaanzishe mifuko yao wenyewe kwa kuweka malengo ya sadaka ya umisheni, na Fedha hiyo ifunguliwa akaunti ya Benki.

- b) Bodi ya Wadhamini iweke kalenda vizuri ya kuhamasisha makanisa miezi 7 kabla ya kufanya mkutano, ili machangizo yafanyike kwa ajili ya mikutano. Fedha itumwe kwa mpesa au kwenye akaunti ya Kanisa au akaunti ya WMMC makao makuu.
- c) Sadaka ya Fungu la Kumi na Sadaka ya Umisheni kila mwezi kutoka makanisa yetu itatumwa kwenye akaunti ya WMMC **CRBD A/C No. 0150 222 9696 00**
- d) Mara nyingi WMMC inatumia sadaka ya Umisheni na Mafungu ya Kumi kufadhili mikutano ya Injili. Na kanisa ambalo halileti zaka na sadaka ya Umisheni hata kama ni **TZS 500**, kweli itakuwa ngumu kuhubiri mikutano.
- e) Sadaka ya Umisheni inaweza kufunguliwa mfuko katika kanisa la mahala pamoja kwa maelekezo ya WMMC makao makuu; ili ifunguliwe akaunti ya Benki.
- f) Wachungaji wanashauriwa kuleta maombi ya kupewa barua kutoka Askofu Mkuu inayowathibitisha kufungua akaunti benki yoyote Tanzania.
- g) Fedha inayochangwa kwa ajili ya mikutano ya injili isitumike kwa kufanya shughuli zingine za Kanisa.

6. HUDUMA YA KUPANDA MAKANISA

Huduma ya kupanda makanisa ni sehemu ya maono ya WMMC ambayo inalenga kulinda, kutetea na kueneza Injili kwa mujibu wa katiba ibara ya 12. Makanisa yetu lengo lake ni Utume, uinjilisti na Umishonari.

- a) Kulea wahongofu wapya ili kuwafanya kuwa kondoo na wanafaunzi wa Yesu. (**MATHAYO 28:20.**)
- b) Utakaso ili waliookoka wafike mbinguni.
- c) Kujenga jeshi la MITUME, MANABII, WAINJILISTI, MCHUNGAJI NA WALIMU.
- d) Kufyatua WAMISHONARI.
- e) Kwa kuwa World Miracle Mission Centre ni Shirika la Injili na umishonari; Makanisa yatakayopandwa, Kufunguliwa, Kuanzishwa au kujiunga na Huduma hii yataitwa makanisa ya Umishonari.
- f) Kila Kanisa lililopandwa linatakiwa kufanya huduma zote kulingana na maono ya WMMC.
- g) Kanisa la mahala pamoja linatakiwa kusimama kama balozi wa Yesu kupitia huduma ya WMMC. Litawajibika kutetea, Kueneza na Kulinda Imani ya Injili inayohubiriwa na WMMC. (**WAFILIP 1:5& 7, 12**).
- h) Uongozi wa Kanisa lazima kuweka ulinzi wa kondoo kwa maombi ya kufunga; maombi ya mkeshi; chini ya mchungaji kiongozi na ulinzi wa mali za kanisa.

- i) Kila kanisa litawajibika kuandaa mpango mkakati, Kuandaa ripoti ya kila mwaka, Kuandaa bajeti na kusimamia utekelezaji wa maono ya WMMC.
- j) WMMC haina mfumo wa kufungulia watumishi walioitwa makanisa, tunashauri mtumishi aliyeitwa afungue kanisa ndipo WMMC inaweza kumfadhili au kumtegemeza.

WMMC kwa mujibu wa katiba, inao mpango kamambe wa kufungua na kuanzisha huduma ya kupanda makanisa kama ifuatavyo:

1) ***Kuanzisha makanisa kwa njia ya Mikutano ya Nje:***

Kanisa au Mchungaji wa mwenye wito ataandaa mkutano Injili katika uwanja ambao ameongozwa na Roho Mtakatifu. Litajengwa hema la maombezi wakati wa mkutano, kisha hilo hema halitatoka baada ya mkutano, ibada ya kwanza itafanyika katika hilo hema na maombezi yakuwa yanaendelea pamoja na semina.

2) ***Kuanzisha makanisa kwa njia ya Kufungua Vituo vya Maombezi katika Mitaa.***

Kanisa au Mchungaji wa kanisa la WMMC la mahala pamoja atajenga jeshi la wanamaombi katika kanisa, jeshi la wainjilisti, jeshi la Wamishonari kwa ushirikiano na makao makuu. Shule za huduma zitafanyika mara kwa mara katika makanisa ya WMMC kisha watasimikwa na kupewa vyeti kwa ajili ya ya kwenda kufungua vituo vya maombezi nyumba kwa nyumba, mtaa kwa mtaa, kijiji kwa kijiji. Mji kwa mji na majiji kwa majiji. Hivyo vituo vitakuwa ndilo kanisa na Huduma za maombezi katika makanisa haya yatakuwa masaa 24.

3) ***Kuanzisha makanisa kwa njia ya Shule za Chekechea; Shule za Msingi na Sekondari.***

Kanisa au Mchungaji wa kanisa la WMMC la mahala pamoja anatakiwa kufungua na kuanzisha shule ya chekekechea au Shule ya msingi kwa ushirikiano na Uongozi wa juu wa WMMC. Mchungaji kiongozi ndiye Mkurugenzi mtendaji wa Miradi yote katika eneo lake.

4) ***Kuanzisha makanisa kwa njia ya Vyuo vya Elimu ya Biblia na Taaluma.***

WMMC inafungua vyuo vya ufundi kwa njia ya Mbalimbali kama ilivyoielezwa katika kipengele nambari 7. Mchungaji wa Kanisa anatakiwa kutafuta kiwanja cha kujenga chuo cha Ufundi na Biblia. Vyuo vingine vitafunguliwa kwa njia ya kuingia ubia na Taasisi ambazo zinamiliki vyuo, rejea mwongozo nambari 2 wa Huduma za jamii. Pale chuoni kutakuwepo na CHAPEL ya wanafunzi, ambayo itaitwa kanisa la chuo. Baada ya mwaka mmoja kuanzishwa utaandaliwa mkutano wa Injili katika kijiji palipo na chuo ili kutoa huduma kwa watu wote wanaoishi maeneo ya chuo.

7. HUDUMA ZA JAMII KWA WMMC

WMMC inanafurahi kukaribisha mashirika ya kidini, afya, elimu ndani na nje ya nchi kuingia ubia yaani partnership/ kwenye Huduma ya Kiinjili na Kimishonari ya World Miracle Mission Centre. Taasisi ya huduma za jamii itaruhusiwa kuingia ubia na WMMC na itapata mwavuli wa kisheria, na kuitwa mdau katika huduma za kiroho na Jamii.

- 1) Huduma zote za jamii kuanzia miradi, shule na Vyuo vilivyoanzishwa chini ya kanisa la mahala pamoja ndani ya huduma ya WMMC, lazima yatasaini mkataba na Makao Makuu ya WMMC, na Mchungaji Kiongozi ndiye atakuwa mkurugenzi mkuu kwa taasisi ndogo za jamii.
- 2) Huduma za jamii zote zitalipa fungu la kumi kila mwezi bila kujali makubaliano katika mkataba kati ya Huduma za Jamii na WMMC.
- 3) Kwa mashirika au Taasisi zilizoingia ubia na WMMC kwa ajili ya kutoa huduma za jamii zinatakiwa kuzingatia mkataba uliosaniwa na katiba ya WMMC.
- 4) Ni sheria ya WMMC kwamba kila Taasisi ya elimu iliyoingia ubia na huduma hii, lazima kuwepo shule za huduma, Kanisa, Semina na Mikutano ya Injili katika vituo vya ubia.
- 5) Kabla ya kuingia ubia na WMMC, Wakurugenzi wa taasisi wa huduma za jamii watapelewa Mwongozo Nambari 1 (Huduma za Kupanda Mkanisa) na Mwongozo nambari 2 (Huduma za Jamii) .
- 6) Masharti na Vigezo yatazingatiwa kulingana na vielelezo vya taasisi inayoomba kuingia ubia na WMMC.

A: KUFUNGUA SHULE ZA CHEKECHEA; MSINGI; SEKONDARI NA VYUO KWA WMMC

WMMC inayo maamlaka ya Kisheria na kikatiba ibara ya 3(6), 3(11)-3(14) kutoa huduma za jamii ikiwa ni pamoja na Elimu kuanzia chekechea hadi vyuo vikuu chini ya sheria ya usajili, ufilisi na Udhamini- RITA CAP 381 (Wizara ya Sheria na Katiba).

Kwa mujibu ya sheria ya Kristo, ni Baraka za Bwana Yesu ambaye anataka tufanikiwe katika mambo yote (3YOHANA 1:2), KIROHO NA KIMWILI PIA.

“Mpenzi naomba ufanikiwe katika mambo yote na kuwa na afya yako, kama vile roho yako ifanikiwavyo” (3YOHANA1:2)

- Tunakuomba kwa furaha taasisi inayoomba kuingia Ubia ituletee vielelezo kabla ya shule/ chuo/ Taasisi/ huduma kuingia ubia (Partnership) na huduma yetu ya WMMC.Vielelezo na ada ya kuingia ubia vimeainishwa katika Mwongozo Nambari

2 wa huduma za jamii.

- Baada ya kusaini mkataba kwa huduma za jamii ambazo ziko chini ya makanisa ya WMMC au kuingia ubia na Taasisi ya elimu ambayo ni kutoka nje, kwa WMMC itatoa nyaraka zifuatazo:
 1. *Kivuli cha Hati ya usajili ya WMMC*
 2. *Hati ya Ubia wa shule na WMMC kwa jina la Shule/ mmiliki yaani Certificate of commission.*
 3. *Mkataba wa ubia/udau wa kisheria ulioshuhudiwa na mwanasheria kwa miaka mitatu.*
 4. *Kivuli cha Katiba ya WMMC kwa ajili ya mwongozo.*
 5. *Barua ya Utambulisho kwa Mkuu wa Wilaya (Kopi kwa Afisa wa Elimu Wilaya; Mkurugenzi mtendaji wa Wilaya; Mtendaji wa Kata na Mtaa)*
 6. *Vitambulisho (IDS) kwa mkurugenzi wa taasisi*
- Baada ya Kukabidhiwa Nyaraka ya Ubia kutoka WMMC tutaanza mchakato wa kuitambulisha na kusajili shule katika **Wizara ya Elimu** ili kupata usajili kisheria; ndani ya miaka mitatu wa mkataba. Rejea Mwongozo nambari 2 wa Huduma za jamii kuhusu vielelezo vya usajili wa shule.

B: KUFUNGUA ZAHANATI NA HOSPITALI KWA WMMC

WMMC inaendelea kusesitiza mafanikio ya Kiroho na Kimwili ndiyo yanaleta Amani ya kweli katika maisha watu wa dini zote, kabila zote, na rangi zote katika jamii. Biblia inaendelea kutoa ushauri huu maandiko haya:

“Mpenzi naomba ufanikiwe katika mambo yote na kuwa na afya yako, kama vile roho yako ifanikiwavyo” (3YOHANA1:2)

- WMMC inafurahi kukaribisha mashirika ya afya Tanzania na nje ya nchi kuwa wadhamini, wadau na kuingia ubia na Huduma ya Kiinjili, Kimishonari na ufadhili ya World Miracle Mission Centre.
- Baada ya kusaini mkataba kwa huduma za jamii ambazo ziko chini ya makanisa ya WMMC au kuingia ubia na Taasisi ya afya ambayo ni kutoka nje, kwa WMMC itatoa nyaraka zifuatazo:
 1. *Kivuli cha Hati ya usajili ya WMMC*
 2. *Hati ya Ubia wa shule na WMMC kwa jina la Kituo cha Afya/ mmiliki yaani Certificate of commission.*

3. *Mkataba wa ubia/udau wa kisheria ulioshuhudiwa na mwanasheria kwa miaka mitatu.*
4. *Katiba ya WMMC kwa ajili ya mwongozo.*
5. *Barua ya Utambulisho kwa Mkuu wa Wilaya (Kopi kwa Afisa wa Afya wa Wilaya; Mkurugenzi mtendaji wa Wilaya; Mtendaji wa Kata na Mtaa)*
6. *Vitambulisho (IDS) kwa mkurugenzi wa taasisi*

- Baada ya Kukabidhiwa Nyaraka za Ubia kutoka WMMC tutaanza mchakato wa kukitambulisha na kusajili Zahanati/ Kituo cha Afya katika **Wizara ya Afya na Ustawi Jamii** ili kupata usajili kisheria; ndani ya miaka mitatu wa mkataba.

C: KUENZISHA VITUO CHA YATIMA KWA WMMC

Kwa mujibu wa katiba ya WMMC, ibara 3(6), tunatoa huduma zaYatima. Tuta furahi kama kituo chako kitaingia ubia na WMMC chini ya mwavuli wa WMMC.

BAADA YA KUIINGIA UBIA WA KIHUDUMA NA WMMC UTAPATA NYARAKA ZIFUATAZO

1. *Hati ya usajili ya WMMC*
 2. *Hati ya Ubia wa shule na WMMC kwa jina la Kituo/ mmiliki yaani Certificate of commission.*
 3. *Mkataba wa ubia/udau wa kisheria ulioshuhudiwa na mwanasheria.*
 4. *Katiba ya WMMC kwa ajili ya mwongozo.*
 5. *Barua ya Utambulisho kwa Mkuu wa Wilaya (Kopi kwa Afisa Tawala wa Wilaya; Mkurugenzi mtendaji wa Wilaya; Mtendaji wa Kata na Mtaa)*
 6. *Vitambulisho (IDS) kwa mkurugenzi wa taasisi*
- Baada ya Kukabidhiwa Nyaraka ya Ubia kutoka WMMC tutaanza mchakato wa kukitambulisha na kusajili Kituo cha yatima katika **Wizara ya Maendeleo ya Jamii, Jinsia na Watoto** ili kupata usajili kisheria.
 - Huu mchakato tutashirikiana kwa habari ya gharama, nyaraka zinazohitajika, CV za walimu, Majengo, Viwanja, na design ya kituo. Mkataba wa Ubia au mwavuli unaweza kusainiwa upya na kuitwa PARTNERSHIP DEED kuonyesha idadi ya shea, mchango wa kila upande na mgawanyo wa maslahi ya kituo cha Yatima.

8. UFADHILI NA SADAKA

1) Huduma ya Ufadhili ya WMMC

Ufadhili ni sehemu ya huduma World Miracle Mission Centre tangu kuanzishwa kwake, kwa mujibu wa katiba ibara ya 12. Tulianza kufadhili mikutano ya Nje katika makanisa ya mengi Tanzania tangu mwaka 2007. Aidha WMMC imefadhili Majengo ya kuabudia katika maeneo mbalimbali katika madhehebu mbalimbali Tanzania. Kuanzia mwaka 2010 tuliweka mwongozo wa ufadhili kama ifuatavyo:

- a) WMMC itaelekeza ufadhili zaidi kwenye huduma ya Mikutano ya Injili, Semina Na Shule za Huduma, kwa sababu roho za watu ni kipaumbele kabla ya mambo yote.
- b) WMMC Itafadhili majengo na Huduma zingine baada ya Mchungaji kuthibitishwa kuwa huduma yake kikanisa inao washirika kuanzia 20 na kuendelea, hasa kwa wale waliojiunga na WMMC kutoka mashirika mengine ya huduma.
- c) Kama Mchungaji anaanza huduma kwa mara ya kwanza na amejiunga na WMMC basi tunamshauri atafute uwanja yeye mwenyewe, na afanye maandalizi ya Mkutano wa nje, utakaoratibiwa na WMMC Makao Makuu. Ataandaa bajeti ya Hema la maombezi na Vyombo na mambo yote, washirika watakaokoka kwenye mkutano ndiyo watakuwa malimbuko kwa huduma yake.
- d) Ufadhili wa Majengo, Viwanja na Huduma za jamii unaweza kufanyika kwa kuanzia asilimia 25 hadi 70% na kiasi kingine Wachungaji wanatakiwa kuchangia gharama kwa ajili ya Baraka. Mara nyingi WMMC inafadhili majengo ya muda kwa uwezo wa watu 30 hadi 70.
- e) WMMC Hufadhili viwanja na majengo ya kanisa baada ya Mchungaji kuthibitishwa na uongozi wa juu, mara nyingi baada ya miaka 2 hadi 3, kwa wale wanaojiunga bila makanisa, au wana makanisa yenye washirika chini ya 20.
- f) WMMC hufadhili kwa uongozi wa Roho Mtakatifu na baada ya kupata ripoti ya Mchungaji husika kwa mujibu wa Ripoti ya Usalama Kipengele nambari 10.

2) Mafungu ya Kumi na Sadaka ya Umisheni

Kwa mujibu wa katiba ya WMMC ibara ya 11, na kwa kuwa tumeshapanda makanisa, na kujenga jeshi la familia ya WMMC, tukubaliane kwamba wakati huu lazima kila kanisa la WMMC, Wadau wa Injili kwa kushirikiana na Bodi ya Wadhamini tuanze kutoa mafungu ya kumi kila mwezi na Sadaka ya Umisheni.

Sadaka ndizo zitajenga msingi wa kifedha kwa ajili ya umisheni na Injili, ili tuendeleo kuokoa roho za watu. Hivyo Sadaka za WMMC zitakuwa mbili:

a) **Sadaka ya Zaka.**

Kila Kanisa la WMMC ni lazima kulipa zaka kila mwezi. Hakuna mtu, mwamini, mwanafunzi au Mtume, kanisa au taasisi ya WMMC ambayo itapata Baraka na

kusimama kama haitoi zaka!

Sadaka hii ya Fungu la Kumi kwa Taasisi za Elimu ambazo zimeingia ubia na WMMC, ni sharti katika Mkataba wa ubia kepengele nambari 2, sehemu ya KITHIBITI A. Kimkataba inatakiwa kulipwa kila baada ya Miezi mitatu au Kota.

b) Sadaka ya Umisheni/ Umishonari.

Sadaka ya Umisheni itatolewa kila mwezi kwa makanisa na Kila baada ya Miezi mitatu kwa huduma za jamii ambazo zinatumia mwavuli wa WMMC. Hii itakuwa ni sadaka ya Changizo ya kila mwezi kutoka kwa makanisa ya WMMC. Kazi yake kubwa ni kuhudumia mikutano ya Injili na Utume.

c) Akaunti ya Benki ya WMMC.

Wachungaji wanaweza kutuma sadaka zao kupitia akaunti ya Benki ya WMMC makao makuu kwa jina la *WORLD MIRACLE MISSION CENTRE*,
CRBD A/C No. 0150 222 9696 00.

3) Mwongozo wa kufungua Akaunti ya Benki kwa makanisa na huduma za jamii.

Wachungaji wote wa WMMC wanashauriwa kufungua akaunti ya akiba katika benki yoyote kama CRDB. Mwongozo wa kufungua akaunti ni kama ifuatavyo:

- a) Mchungaji kiongozi ni lazima aende benki iliyokaribu na eneo la kanisa ili apate maelelekezo ya kufungua akaunti.
- b) Mchungaji ni vizuri akaomba vielelezo vinavyohitajika kufungua akaunti: mfano CRDB:
 - i) Kivuli cha katiba WMMC
 - ii) Mhutasari wa kikao cha kanisa kufungua akaunti
 - iii) Picha 2 za masinotori
 - iv) Barua ya kanisa ya kufungua akaunti
 - v) Barua kutoka kwa askofu Mkuu/ Mwenyekiti wa mtaa
 - vi) Wadhamini 2 wenye akaunti CRDB, hasa makanisa au taasisi
 - vii) Mkataba wa uchungaji au ubia
- c) Mchungaji anashauriwa kuteua mhasibu nay eye kuwa mmojawapo wa masignatori.
- d) Washirika wanaweza kuingiza au kulipa mafungu ya kumi moja kwa moja kwa M-pesa kwenda akaunti ya benki.

- e) Mfumo mzuri wa kuweka na kutoa pesa Benki utalisaidia kanisa kupata ufadhili kutoka mashirika mengine yenye mzigo na Injili, Umishonari na hata huduma za jamii.
- f) Itakuwa rahisi kwa mradi wowote wa kanisa kupata mkopo kwa riba nafuu kwa kielelezo cha Statimenti ya Benki.

9. TOVUTI ZA WORLD MIRACLE MISSION CENTRE

Huduma ya Uinjilisti ni kupeleka habari njema katika kabila, lugha na mataifa, kwa njia ya uso kwa uso au kwa kutumia mitandao ya kijamii kama *radio, televisheni, vipeperushi, tovuti, facebook, intaneti, barua pepe, barua ya kuhandika kwa mkono, vitabu* na njia nyingi sana za kimtandao. Maarifa yameongezeka sana katika siku hizi za mwisho kama Danieli alivyotabiri katika Daniel 12:4. Maarifa haya WMMC inataka iyatumie kupeleka ujumbe wa injili kwa watu ambao hawajafikiwa na Injili katika vijiji, miji, majiji na mataifa mbalimbali katika sayari ya dunia.

Katika mpango mkakati wa WMMC, Mwaka 2010 tulizindua tovuti yetu iliyogharimu TZS.1 Milioni. Mtandao wetu unaitwa WWW.WORLDMIRACLEMISSION.ORG; Mchungaji Lutashobywa kwa kushirikiana na IT- Bestcom walilipia gharama za kujenga tovuti na kuendelea kulipia kodi ya kila mwaka Dola za kimarekani 150. Kampuni ya BESTCOM kama mfadhili wetu alilipia kodi kwa kipindi cha miaka mitano.

Tovuti hii itakuwa ni mtandao BABA NA MAMA wa WMMC wa kitaifa na Kimataifa unaounganisha na kutoa mwongozo na taarifa za utekelezaji wa huduma na maono saba ya WMMC.

I. Mwongozo kwa Tovuti za Mkanisa- Kitaifa.

Tunaomba sana ushirikiano wa makanisa na wadau wa WMMC kufadhili mtandao huu na mitandao mingine kama vipindi vya radio na Televisheni. WMMC inategemea kutakuwa na tovuti za makanisa ya WMMC kama ifuatavyo:

- 1) Kila Kanisa la WMMC linalopandwa linatakiwa kulipia, kujenga, kumiliki na kuendeleza mtandao wa tovuti kwa ajili ya kueneza, kutetea na kulinda imani ya Injili na Umishonari.
- 2) Kanisa la Mahala pamoja litaandaa taarifa mbalimbali ikiwa pamoja na picha za ibada za kila siku; ratiba za ibada; mahubiri kila siku, Jina la Kanisa na anwani.
- 3) Taarifa hizi na ripoti zote za kanisa zitapelekwa makao makuu kwa ajili ya kujenga tovuti ya Kanisa.
- 4) Kila Mchungaji wa kanisa la WMMC lazima kuandaa uongozi wake kuhakikisha wanapeleka ujumbe kwa njia ya mtandao wa tovuti.

- 5) Kila kanisa la WMMC linatakiwa kufungua sanduku la posta kwa ajili ya mawasiliano na makao makuu.
- 6) Mahubiri ya kila Jumapili na mikutano lazima yarekodiwe kwa ajili ya kuyarusha kwenye mtandao. Lakini yatatumwa kwanza makao makuu kwa njia ya barua pepe kwa ajili ya kuyachuja na kuyahakiki.
- 7) Katika Mtandao wa Kanisa la Mahala pamoja Tanzania, lazima lionyeshe, Uhusiano wa Taarifa katika mtandao na Mtandao wa Kitaifa na Kimataifa.
- 8) Gharama za kujenga Tovuti zitalipwa na Kanisa kwa ushirikiano na makao makuu. Lakini kodi ya mwaka italipwa na Kanisa la mahala pamoja.
- 9) Ni vizuri kuwa makini kwa taarifa zinazotolewa katika tovuti ya makanisa Tanzania na kuzingatia sheria ya nchi, kupitia TCRA.

II. Mwongozo kwa Tovuti za Makanisa/Huduma za Kimataifa

- 1) Kwa huduma ya makanisa nje ya Tanzania, Wataleta taarifa zao za tovuti Makao makuu Dar es salaam Tanzania.
- 2) WMMC makao makuu inaweza kushughulikia kujenga tovuti baada ya kanisa / huduma kuomba msaada, kuleta taarifa za kanisa na kulipia gharama kwa BestCom, ambayo ni kampuni mdau wetu wa IT.
- 3) Taarifa katika Mtandao wa kanisa lazima kuonyesha uongozi, Utawala, na uhusiano wa Huduma ya WMMC makao makuu na huduma ya kanisa la Ng'ambo.
- 4) Gharama za Tovuti zitalipwa na Kanisa/ Huduma ya Kimataifa .
- 5) Taarifa za Mwavuli wa WMMC lazima ziweko kwenye tovuti kwa makanisa ya Kimataifa.

III. Mwongozo kwa Tovuti za Huduma za Jamii

- 1) Kwa huduma za jamii Tanzania, zilizoingia ubia na WMMC, kama shule, vyuo, hospitali na vituo vya yatima, ni lazima kufungua tovuti zao kwa ajili ya kutangaza huduma.
- 2) Makao makuu ya WMMC itashughulikia kufanya ubunifu wa kujenga tovuti, na kuweka vizuri taarifa katika mtandao.
- 3) Taarifa katika Mtandao wa huduma za jamii lazima kuonyesha uhusiano na Utawala wa Huduma ya WMMC wa makao makuu na katika huduma za jamii.
- 4) Gharama za Tovuti zitalipwa na Taasisi husika au huduma za jamii.
- 5) Taarifa za Mwavuli wa WMMC lazima ziweko kwenye tovuti ya Huduma za Jamii

10. USALAMA WA HUDUMA YA WMMC

Kutakuwa na Tume ya usalama wa Huduma ambayo itakuwa inashughulikia usalama wa mali za huduma, Ulinzi wa Kisheria, na Migogoro inayoweza kujitokeza kutokana na baadhi ya watumishi kukosa uaminifu na kutokana na tafsiri ya katiba ya WMMC. Kimsingi kila Mchungaji, Mshirika, mdhamini, wakurugenzi, wamishonari na wahubiri wa WMMC wanatakiwa kuwa walinzi wa usalama wa huduma ya WMMC.

I. KAZI ZA TUME YA USALAMA

- 1) Raisi na Askofu Mkuu ataunda Tume ya Usalama wa WMMC, kutokana na Misingi ya Imani, malengo ya huduma na maono ya huduma. Tume hii itaitwa INTELIJENSIA YA KIROHO (SPIRITUAL INTELIGENCY).
- 2) Mali Zote za huduma zitasimamiwa na Tume ya Usalama wa WMMC.
- 3) Itafanya Upelelezi na Uchunguzi wa kiroho na kitaaluma kwa usalama wa WMMC, kwa ushirikiano na Watu wote, yaani wanaomini na wasioamini.
- 4) Itafuatilia kashfa na Mienendo mibaya ya Wachungaji kwa siri na kwa uongozi wa Roho Mtakatifu.
- 5) Itaandaa Ripoti zote za upelelezi na uchunguzi juu ya jambo lolote baya, dhambi au kashfa itakayojitokeza, na kuwasilisha ripoti kwa Bodi ya Wadhamini au Askofu Mkuu.
- 6) Mwasheria wa Huduma ya World Miracle Mission Centre atakuwa Morial Chambers Advocate, Mkurugenzi wake ni Mchungaji Justine Kalebu, Ofisi zake ziko Dar es salaam Tanzania.
- 7) Mwanasheria wetu anaweza kuwasiliana na wanasheria wengine kutoka nchi yoyote ambapo kumeanzishwa Kanisa au Huduma kwa Mwavuli wa World Miracle Mission Centre.

II. MIGOGORO YA NDANI YA WMMC

- a) WMMC inaamini chanzo cha migogoro yote katika jamii ya waaminio na wasiyoamini, katika jamii na jumuiya za kimataifa ni DHAMBI. Hivyo tume inatakiwa kufanya kazi kiroho na Timu kali ya MAOMBI YA KINABII.
- b) Migogoro yote ya utendaji ndani ya huduma ya WMMC itasuluhishwa na kamati ya Migogoro itakayoundwa ndani ya Tume ya Usalama, Kwa kusikiliza pande zote za migogoro ndani ya huduma.
- c) Kama kutatokea kutokuelewana katika pande za mgogoro, Pande zinaweza kupendekeza msuluhishi Mwingine nje ya Tume ya Usalama ambaye hatapendelea

upande wowote na atafanya uamuzi kwa haki inayopatikana kwa njia ya Imani.

- d) Msuluhishi anaweza kuteuliwa na Askofu Mkuu au Bodi ya wadhamini baada ya kupata ripoti ya Tume ya Usalama ya WMMC, iwapo pande zote hazikuridhika. Baada ya uamuzi wa Msuluhishi kutolewa shauri au mgogoro utahesabika kumalizika kwa pande zote mbili, na Maombi ya Toba yatafanywa na Bodi ya Wadhamini.
- e) WMMC inaamini haki ya pande zote mbili katika migogoro ya watu wa Mungu inapatikana kwa njia ya IMANI, kwa toba na KUSAMEHE **SABA MARA SABINI**.
- f) Kama mgogoro utahusu pande zote mbili ndani ya WMMC na bado hawakuridhika na maamuzi ya Tume ya Usalama, Bodi ya Wadhamini na Askofu Mkuu, basi Bodi ya wadhamini itapiga kura ya Turufu (VETO), kuwasimamisha huduma, baada ya kuona kwamba wameshindwa kusameheana kwa mujibu wa Biblia na kipengele (d).

III. MIGOGORO YA NJE YA WMMC

- a) Kama Mgogoro utakuwa ni kati ya watumishi wa WMMC na watu wasioamini nje ya huduma, au kati ya WMMC na taasisi nyingine na hawakuridhika na maamuzi ya msuluhishi au Tume ya usalama au bodi wadhamini, basi wanashauriwa na uongozi wa juu wa WMMC kutafuta haki kwa njia ya sheria ya nchi.
- b) Maamuzi na Hukumu ya mahakama itakuwa ni ya mwisho kwa migogoro unayohusu watumishi wa WMMC na watu wasioamini au Taasisi zingine.

IV. MIGOGORO YA KIKATIBA

Pale ambapo kutatokea mgogoro au kutokuelewana kutokana na maana au tafsiri ya kipengele chochote katika katiba hii au chombo au waraka uliotengenezwa chini ya au kipengele kinachohusiana na WMMC, tafsiri ya Kamati Kuu ambayo inaundwa na Secretarieti ya Huduma, itafanya maamuzi ya mwisho na yatakuwa na nguvu ya kisheria, ilimradi kwamba maamuzi yatafanyika kwa azimio lililopitishwa na kurekodiwa na Kamati Kuu kwenye kikao kitakachoitishwa na kufanyika kwa kusudi hilo; NA ZAIDI ILIMRADI :

- a) Kwamba Kamati Kuu inaweza kuamua vinginevyo baada ya maamuzi ya kwanza kwa kufuata mchakato uleule.
- b) Kama kutakuwa na swali/ hoja yoyote kuhusu maamuzi ya mwisho yaliyofanywa au vinginevyo yale maamuzi yakionekana yana jambo baya, rejea zinaweza kufanyika kwa kutumia mwanasheria/wakili wa WMMC kwa maandishi ili kutatua mgogoro.

- c) Bodi ya Wadhamini waliohasisi WMMC watakuwa na VETO/maamuzi ya mwisho juu ya mambo yote yayohitaji kutafsiriwa katika katiba hii, na maamuzi hayo yatakuwa yana nguvu ya kikatiba na ya mwisho. Hapatakuwa na shitaka lolote baada ya maamuzi ya Wahasisi wa Asasi.
- d) Zaidi hapo Msajili kutoka Wizara ya Katiba anaweza Kutoa Ushauri ili kumaliza Mgogoro, iwapo Bodi ya Wadhamini itaomba msaada kwa maandishi.

V. MALI ZA HUDUMA

Mali zote za huduma kama vitu vinavyohamishika, Visivyoamishika kama Viwanja, miundo mbinu, majengo nakadhalika vitasimamiwa na Tume ya usalama kwa ushirikiano na raisi wa huduma ya WMMC:

- a) Wachungaji wa makanisa wanatakiwa kufatilia na kununua Viwanja vya Kanisa, na Hati ya Viwanja vya Makanis lazima ziandikwe kwa jina la Mmiliki ambalo ni -THE TRUSTEES OF WORLD MIRACLE MISSION CENTRE.
- b) Ni dhambi kuandika kiwanja au mali ya huduma ya WMMC kwa jina la Mchungaji. Mali za mchungaji na familia yake ndizo ziandikwe kwa jina la Mchungaji na Mke wake.

VI. MALI ZA FAMILIA YA WATUMISHI WA WMMC

- a) WMMC inaamini katika Neno la Mungu linalosema ilipo hazina yako ndipo na moyo wako ulipo (**LUKA 12:34**)
- b) Kwa sheria ya Imani na Roho ya WMMC, itakuwa ni lazima hati miliki ya mali za mchungaji na familia yake ziandikwe kwa jina la Mchungaji na Mama Mchungaji; yaani Bwana na Bibi.
- c) WMMC haimini katika kuandika wosia kwa familia ya Mchungaji kabla ya kumiminwa; Tunawashauri wachungaji kumiliki pamoja na wake zao kwa kuandika Jina la Mchungaji na Mama mchungaji katika nyaraka zote za hati miliki za mali.
- d) WMMC haizuii Mchungaji au Mtumishi kuandika wosia pale anaposhuhudiwa kufanya hivyo rohani mwake na dhamira yake. Kimsingi haki ya kisheria kuandika wosia.
- e) Uongozi wa WMMC utafuatilia pia maisha ya mchungaji katika kuishi familia yake kwa upande wa mali, hii itasaidia kuzuia migogoro ya mirathi baada ya mmoja wapo kuondoka kwenda mbinguni.
- f) WMMC inaamini ndoa ni ufalme kamili wa Mungu, hivyo Mume na Mke wanatakiwa kulimiliki pamoja, kuishi pamoja na kufanya maamuzi pamoja ili kuzuia migogoro katika ndoa za Watumishi wa WMMC.

11. DIRA YA WMMC KUFIKIA MWAKA 2020

WMMC, kama Huduma ya Injili na Umishonari, inayo maono makubwa yaliyofunuliwa na Roho Mtakatifu kwa ajili ya maendeleo ya huduma. Katika kipindi cha miaka 10 iliyopita tumelipa gharama kubwa kwa ajili ya kuweka msingi wa maendeleo. Tumemwomba Bwana atupe ramani ya kutufikisha mwaka 2020 tukiwa tumefikia watu wengi kwa Injili na hasa vijijini ambapo watu wengi wanahitaji Injili.

A. Maono na Dira ya Mwaka 2020 (VISION 2020)

Chini ya uongozi wa Mchungaji Justice Lutashobya, Mungu alijifunua na kuweka kuweka malengo na kupanua maono ya huduma. Na kufikia mwaka 2020, World Miracle Mission Centre imejipanga kutimiza maono yafuatayo:

- 1) Kuendesha shule za huduma mara 3 kwa mwaka TANZANIA na mikoa mingine 26 ya Tanzania, katika Wilaya 179. Na shule zaidi 7 katika mataifa kwa mwaka kufikia mwaka 2020.
- 2) Kujenga Kituo kikubwa cha Umishonari cha Huduma ya WMMC katika uwanja wa Kagoma, Muleba Kagera, ambapo tunazo hekali 3 za ardhi. Katika kituo hiki kutakuwa na mitaala ya elimu ya Kiroho; Elimu ya kimwili, maombezi, huduma za kanisa; Hoteli, Ukumbi wa makongamano; redio na baadae televisheni.
- 3) Tunakusudia kujenga Kituo Kikubwa cha Kimataifa pale Kibaha au Dar es salaam, kwa ajili ya Makongamano na Mikutano ya Kimataifa, Vyuo Vikuu vya Biblia na Elimu ya Taaluma; Mikutano ya Maombi na Huduma mbalimbali.
- 4) Tunakusudia kujenga Mabwawa ya kubatizia kila kanisa la WMMC na hata vyuo vya WMMC. Hii ni kutokana na umbali mrefu kutoka vijijini kwenda kwenye mito au visima vya asili.
- 5) Tunao mpango mkakati wa kuhakikisha tunafungua Vyuo vya Elimu ya Kiroho na Ufundi zaidi ya 12 kwa mitaala mbambali kufikia mwaka 2020.
- 6) WMMC inayo maono na mpango mkakati wa kupanda makanisa 120 Tanzania kabla ya mwaka 2020 na Makanisa 70 ya kimataifa.
- 7) Tunakusudia kufungua kijiji cha WMMC kuanzia hekali 50 hadi 100 kwa ajili ya huduma mbalimbali za jamii.
- 8) Tunapanga kuwa na vituo vya maombezi katika mitaa yaliyopandwa makanisa ya WMMC.
- 9) Tunapanga kuongeza Mikutano kwa mwaka kutoka mikutano 40 kwa mwaka kwenda mikutano 70 kwa mwaka.
- 10) Tutakuwa na MBIO ZA KINABII mara kwa mara kujenga jeshi la Wamishonari na kuimarisha makanisa ya WMMC.